

UNIVERZITET U TUZLI

PRIRODNO – MATEMATIČKI FAKULTET

U P U T S T V O

O POLAGANJU PRIJEMNOG ISPITA ZA KANDIDATE KOJI SU SE PRIJAVILI NA KONKURS ZA UPIS STUDENATA U I GODINU PRVOG CIKLUSA STUDIJA NA PRIRODNO – MATEMATIČKOM FAKULTETU UNIVERZITETA U TUZLI U AKADEMSKOJ 2017/2018. GODINI

1. Prijemni ispit na Prirodno–matematičkom fakultetu Univerziteta u Tuzli polaže se kao kvalifikacioni ispit. Prije početka polaganja prijemnog ispita kandidati se putem oglasne ploče i WEB stranice fakulteta trebaju informisati o mjestu (prostoriji) u kojoj će polagati prijemni ispit.
2. Kandidati trebaju doći na mjesto određeno za polaganje prijemnog ispita najmanje 15 minuta ranije. Kandidat koji zakasni na prijemni ispit neće moći pristupiti polaganju prijemnog ispita i eliminiše se iz procedura prijema na Univerzitet.
Izuzetno, kandidat koji iz naročito opravdanih razloga ne pristupi polaganju prijemnog ispita, dužan je najkasnije narednog dana podnijeti zahtjev Komisiji fakulteta za omogućavanje naknadnog polaganja prijemnog ispita, uz pružanje dokaza o spriječenosti polaganja prijemnog ispita, na dan utvrđen Konkursom. Odluku po zahtjevu kandidata Komisija fakulteta/Akademije donosi narednog dana, sa bližim uputama, ukoliko se zahtjevu udovolji.
3. Prijemnom ispitu može pristupiti kandidat čija je prijava na Konkurs potpuna i blagovremena.
4. **Identifikacija kandidata vrši se ličnim dokumentom** kao što je: lična karta, pasoš ili vozačka dozvola. Strani državljani identifikuju se pasošem.
Prijemni ispit kandidat polaže pod šifrom imena i prezimena koja se pečati u posebnoj koverti.
Nakon identifikacije svi kandidati koji su pristupili prijemnom ispitu dužni su postupati po uputi ovlaštenog člana Komisije za dežurstvo tokom prijemnog ispita u pogledu redoslijeda radnji koje će obavljati tokom ispita.
5. Kvalifikacioni ispit za studijski odsjek **Biologija** je iz predmeta Biologija i sastoji se od 20 pitanja od kojih svaki nosi po 2 boda.
Kvalifikacioni ispit za studijski odsjek **Fizika** je iz predmeta Fizika i sastoji se od 20 pitanja i zadataka od kojih svaki nosi po 2 boda.
Kvalifikacioni ispit za studijski odsjek **Geografija** je iz predmeta Geografija i sastoji se od 20 pitanja od kojih svaki nosi po 2 boda.
Kvalifikacioni ispit za studijski odsjek **Hemija** je iz predmeta Hemija i sastoji se od 20 pitanja i zadataka od kojih svaki nosi po 2 boda.
Kvalifikacioni ispit za studijski odsjek **Matematika** je iz predmeta Matematika i sastoji se od 10 zadataka od kojih svaki nosi po 4 boda.
Prijemni ispit se obavezno radi nebrisivom hemijskom olovkom plave ili crne boje.

Na prijemnom ispitu zabranjeno je unošenje elektronskih pomagala (kalkulatora, mobitela), kao i pisanih materijala.

Kandidat koji se ne bude pridržavao Uputstva datog u prethodnom stavu bit će udaljen sa prijemnog ispita.

Ukoliko se odgovor na pitanje daje po sistemu zaokruživanja, svaki drugi oblik označavanja (precrtavanje, podvlačenje, dopisivanje i sl.) smatrat će se netačnim odgovorom. Ukoliko se odgovor daje dopisivanjem teksta ili izradom zadatka, rad treba da bude pregledan i čitljiv. Prijemni ispit radi se najmanje jedan sat efektivno.

Prijemni ispit koji se sastoji od 1 nastavnog predmeta, a koji je baziran na izradi zadataka, traje 2 sata.

Prijemni ispit koji se sastoji od 1 nastavnog predmeta, a koji nije baziran na izradi zadataka, traje 1 sat.

Zabranjeno je napuštanje prijemnog ispita prije završetka istog.

Po završetku prijemnog ispita, kandidati skupa sa predsjednikom Komisije za dežurstvo tokom prijemnog ispita odlaze u Dekanat Fakulteta, gdje se njihov rad ovjereno kopira u prisustvu Predsjedavajućeg Komisije za realizaciju Konkursa za prijem studenata. Ovjerena kopija rada se na svakoj svojoj stranici, u prisustvu svjedoka, potpisuje od strane kandidata, Predsjedavajućeg Komisije za realizaciju Konkursa za prijem studenata i Predsjednika Komisije za dežurstvo tokom prijemnog ispita. Ovjerena kopija rada se uručuje kandidatu, dok se originalni rad šifrira i stavlja u zatvorene koverta koje se onda predaju Predsjedniku Komisije za dežurstvo tokom prijemnog ispita.

OSIM ODGOVORA NA POSTAVLJENO PITANJE, NA TESTU JE ZABRANJENO STAVLJATI BILO KAKVE ZNAKOVE, A POTPISIVANJE VLASTITOG IMENA DOZVOLJENO JE ISKLJUČIVO NA IDENTIFIKACIJSKOM LISTIDU KOJI SE PAKUJE U POSEBNU KOVERTU. U SUPROTNOM TEST ĆE BITI PROGLAŠEN NEVAŽEĆIM I ISTI SE NEĆE UVRSTITI U RANG LISTU.

Predsjedavajući Komisije
za realizaciju Konkursa za prijem studenata



dr.sc. Vedad Pašić, vanredni profesor